



DEO OPTIMO MAX.
UNI ET TRINO,
VIRGINI DEI-PARÆ, ET S. LUÇÆ,
Orthodoxorum Medicorum Patrono.

QUÆSTIO MEDICA,
CARDINALITIIS DISPUTATIONIBUS,
*manè discutienda, in Scholis Medicorum, die Martis quintâ mensis
Martii, anno Domini M. DCC. LXV.*

M. SIMONE-ANTONIO BRINGAUD,
Doctore Medico, Præsîde.

An prægnanti deambulatio?

I.



FÆMINA, in cujus eleganti fabricâ partes inter se omnes cum quodam lepore consentiunt, numeris omnibus perfectum & expletum animal à naturâ intenditur, quæ luculentum suæ dedit specimen industriæ, dum in eam ut sui delicias, tot veneres, & gratiarum ornamenta congescit. Fœmina quanquam animæ nobilitate viro non inferior, ab eo tamen animi viribus plurimum dissentit, & dotes possidet longè diversas, sicut quod in ipsâ concinnum, venustum, politum, & comptum apparet, id ipsum in viro effœminatum, fractum, molle & abjectum habeatur. Neque etiam partium tantummodo generationi inservientium situ & numero, sed & earundem structurâ,

frigidiorique & humidiori totius corporis temperie à Mare discernitur. Hæc digna conjugis amplexibus, ejusque adjuta confortio, in se ipsâ generat, multumque confert ad opus omnium maximè naturale: unâ enim cum sanguine, quem antequam huic operi navet operam, ut superfluum & solâ copiâ excrementitium singulis mensibus excernere solet, semen quoque sufficit atque subministrat, quod non semper virili postponitur: utrumque prolificum est, & è solis testibus decedit, ad quos longo viâ tractu per vasa sinuosa arte singulari naturæ purior sanguis amplissimis spirituum copiis comitatus appellit, ut morâ diuturniore materia feminis præparetur, præparata à testibus recipiatur innatâ proprietate, ut unicuique parti corporis insitum est, proprium & sibi conveniens alimentum recipere more stirpium, quæ cognatum humorem & sibi magis familiarem ex parente omnium tellure fiunt & dulciter proleant.

I I.

UT promittunt divitias quas non exhibent, pauperes Alchymistæ, dum auri sacrâ fame luridi ac penè enecti, alibi quàm in fodinâ confici atque fabricari contendunt: sic illi parùm sui sunt memores, & magno conatu magnas nugas dicunt, qui alium ab utero locum homini generando substitui posse nimium credulis persuadent. Jaceret sanè Divina vis insita femini, nisi mirabili uteri virtute suscitaretur, ubi, velut in solâ humani diverforii cellulâ, necessarii concurrunt apparatus, unique parti nobilissimæ innata virtus est semen proliciendi, in actum promovendi, suoque sinu & complexu amabiliter fovendi: atque ex parentis utriusque nexu & consuetudine, feminis à Mare emissis integritate, arctâque illins intrâ fundum naturæ feracissimum retentione, & retenti promotione ad officium, tantæ molis opus exurgit, & gravida evadit mulier, cujus graviditas non ex solo ventris timore, aut menstruorum suppressione, non ex oculis sublividis, aut urinarum substantiâ, colore & sedimento, sed ex foetus motu, ut certo & indubitato hominis inchoati indicio, dumtaxat agnoscitur; qui recipit & adipiscitur in utero tanquam in verâ vitæ officinâ nutrimentum, accretionem, maturitatem, & sui carceris impatiens ex illius latebris tandem emergit, ut lucem suavissimam aspiat.

I I I.

MULIEREM utero gerentem velut agmine facto pravorum affectuum ilias confestim invadit: modò ex depravatâ appetentiâ variorum premitur desiderio, quæ interdum aut acida aut acerba, aut acria & falsa sunt: modò expetit testas, carbones, veteres pannos, & alia peregrina & à naturâ prorsus abhorrentia: modò illam fatigant & affligunt animi deliquia.

gravedines, capitis dolores & dentium acerbissimi, scœatus frequens, nausea, vomitio quoque plerumque comitatur eorum maximè humorum qui in præcordiis redundaverint; flatus sæpissimè permulti circum claustra fremunt, qui distendentes abdomen sævissimos cruciatus inferunt, totum denique corpus, iners, plumbeum, languidum, importunâ lassitudine fractum fatiscit: Hæc & aliæ gravissimæ quæ impendent procellæ, crebrò ortum repetunt ex vitioso quodam recremento ob suppressos menses ventriculi tunicis impacto, aut ex impuris vaporibus, nec rarò quoque contingunt prægnantis incautæ vitio, quæ & nimio languescit situ & pigritiâ, & omnis generis cibis indulget ac sese ingurgitat, quorum plerisque malè creditur, undè suæ quasi libidini relictî humores, nec ampliùs edomiti à naturâ, quæ penitus incumbit conformationi & perfectioni foetus, magnâ copiâ coacervantur, & obstructions pariunt, necnon transpiratione prohibita putredinem, & ferocem in dies induentes indolem magnas strages edunt ubicumque ponunt vestigium, cunctaque intus diruunt & turbant, ex quibus febres variæ ac infinitæ penè calamitates erumpunt.

I V.

QUEMADMODUM qui nullis se corporis motibus exercent, & inertia quietique perpetuæ se totos addicunt, crassitie & gravitate corporis enervati, deteriori valetudine fruuntur, ut quos occupat & obruit uberrimus excrementorum proventus, quæ calorem nativum intercipiunt, corpus refrigerant, & morbis frigidis atque humidis materiem suggerunt: sic gravissima sibi importat mala grævida mulier, dum à quâcumque corporis exercitatione prorsus abducitur, sibi & foetui non parùm amicâ & salutari. Causam sanitatis conservatricem agnoscit pars Medicinæ salubris motum & exercitationem: æquis illius legibus impunè nemo refragatur: non finit ergò quemquam, cujuscumque sit ordinis & conditionis, absque magno sui detrimento, se totum dedere quieti, languori & desidîæ, his vitis ipsamet natura reclamitat. Sic recens natis agitatio in cunis tenet locum exercitii, qui jam uteri latibulis conclusi, motu & calcitratu instituerant exercitationis ejusdam rudimenta: pueris competunt lusus & cursus temperati, adultis & robustis pila palmaria, venatio, equitatio; senibus ut jam effoetis & imbecillis, gravidis mulieribus, convalescentibus & nondum è morbo recreatis, deambulatio. Istæ exercitationes cuique ætati & temperamento congruentes & idoneæ, ad prosperam valetudinem iter munant ac exploratum exhibent, quarum scilicet virtute & beneficio gravium propulsantur ægritudinum incommoda, quibus ob ventilationem occasio præciditur, necnon excrementa discutiuntur, suâ experientiâ, morâ

& cunctatione perniciem aspersura visceribus, calorque natus solutus & liber redditur vegetior, alimentorum concoctio, distributio, nutritioque fit felicior, & functionum integritas totiusque corporis robor prodit.

V.

SUOS foetus & maternos patitur manes, dum ad rem suam parùm attenta gravida parens, veterno torpet & hebescit ignaviâ, amplamque excrementorum segetem congerit, quorum colluvie & contagione fordescit, & inficitur salutare foetus pabulum, cujus benignitate destitutus, pravè nutritur, languorem vitiosamque constitutionem contrahit & labem, quæ, quamvis ipsa cupiat salus, nusquam eluitur. Sic caducis principiis satus, & inops vitalis fundi, nascitur iniquis conditionibus. Felix ille è contrario, qui toto gestationis tempore ex puro & laudabili sanguine materno, ut primo sui alimento, vim ortus sui duxerit, & temperaturam in morbos nequaquam proclivem, ut non minùs bonâ constitutione, quàm fortunarum possessione gaudeat. Foetus ergo magnos percipiet sanitatis fructus, neque huic & sibi felicitatem exiguam accerferet gravida parens, si servatâ idoneâ victus lege, cæterisque ad hunc statum requisitis moderato corporis motu se exerceat, non quidem vestatione in curru; quæ frequentiores abortus ciet, mulieri vacanti ad tedium demulcendum prescribendâ, non aliis laboribus seu exercitiis, pueris, adultis & robustioribus concessis, in quibus corpus nimium agitur, verùm deambulatione cuique graviditatis tempori accommodatâ, per vias tritas, planas, à solis ardoribus tutas, platano cœlibe conspersas & opacas, cujus usu jucundo in gratiam redit cum alimentis salubribus, corpus universum non nihil incalescit & ventilatur, onustum levatur, ac superfluis plerisque vacuum evadit, facilis fit & libera spiratio, omnis lassitudinis sensus castigatur, causaque tot affectuum quibus graviditas opportuna est quasi statione relicta, dissipatur & evanescit: quæ demùm artubus potissimum inferioribus, uteri ligamentis, musculis abdominalis vigorem qui sufficiat ventris oneri, firmitatem & alacritatem procurat: hinc vires se proferent ante omnia labori partus sustinendo pares, qui naturalis conditiones sortitus, haud dubiè Lucinâ etiam non opem ferente, faustum habebit eventum, & prægnans pulchrâ faciet se prole parentem.

Ergò prægnanti deambulatio.

Proponcbat Parisiis LUDOVICUS-ALEXANDER CÉZAN,
Parisiensis, Saluberrimæ Facultatis Medicinæ Parisiensis Baccalaureus,
A. R. S. H. 1765. A SEXTA AD MERIDIEM.

Typis F. A. QUILLAU, Universitatis & Fac. Med. Typographi. 1765.